

## ➤ L'Acque d'Orezza da l'Antichità à oghje

Zirla à 14° in core di l'Orezza, in u palazzu verde di a Corsica, trà castagni maestosi è filette tamante. Naturalmente gasosa, st'acqua di ghjuvenza cù virtù curative, ricunnisciute dipoi l'Antichità, hè a più ricca in ferru è manganese. Inventata in u 1777, dichjarata d'utilità publica in u 1866, a sorgente dipartimentale, oramai pruprietà di a Cullettività di Corsica, hè un puntellu di l'economia di a Castagniccia è un simbulu di u patrimoniù naturale di a Corsica.

**T**empi fà, si dicia ch'ella zirlava direttamente in fondu di a valle d'Orezza in un locu pocu accessibile induve si pudia entre « da un solu latu pè un'arcata stretta stretta. Solu duie persone à u più pudianu entre à tempu ». (1828). Pè facilità l'accessu à i numerosi curisti, travaglii sò stati necessari. A gran parte fubbe finanziata da u Duca di Bordeaux. Cusi, dopu avè compiu i travaglii, una petra in marmeru di Livornu fubbe posta nant'à i lochi pè ringrazià u famosu dunatore.

**O**ghje ghjornu, sta petra ùn ci hè più ma, sempre agruttata sott'à u so chioscu legendariu, a vasca di a funtana hè imbellita da i raghji di u sole chì traversanu e volte. Cum'è un paghjolu incantatu ma troppu pienu, a funtana ribocca un'acqua culore d'oru è chì sbullaccheghja senza piantà nanzu d'esse beta, cum'è un elisiriu magicu esciutu dirittu dirittu da u corpu di a terra.

**C**um'è pè tutte e sorgente, l'acqua minerale d'Orezza hè esciuta da l'acque piuvane chì s'infiltranu in e capillarità di a terra sin'à e prufundezze. Studii anu mustratu chì ci vole una vintina d'anni à l'acqua d'Orezza pè ghjunghje, grazia à una filtrazione naturale, ind'a falda induv'ella si mischja à stu gasu, è induve serà prelevata pè esse imbutigliata ! Sti vint'anni sò necessari pè carcà l'acqua minerale d'Orezza di carbonati di ferru è altri minerali nanzu di scuntrà u so gasu carbonicu in spaccature. St'ultimu essendu esciutu direttamente da a cumbustione di u nocciulu di a terra.

**I**nd'un manuscrittu d'Angelo Francesco Colonna, di l'annu 1686, l'autore spieca chì « si trova in Orezza un'acqua acitosa, linda, diuretica pè quelli chì soffrenu da u latu di a viscica » - « L'acqua acitosa d'Orezza hè culore di granu. Hè cusi punghjente è fresca ch'ùn si pò beie. St'acqua ferebbe prò contr'à e malatie di u fecatu. » Frà e numerose sorgente in Corsica, si parla digià à u 18u seculu di e virtù benefiche pè a salute di l'acque d'Orezza, ricercate pè u so ferru. Pasquale Paoli, l'eroe di l'indipendenza corsa, si rendia quasi tutti l'anni in cunventu d'Orezza pè beie l'acqua acitosa di sta sorgente.

**I**n u 1805, hè classificata frà e sorgente ferrigne è gasose da a Scola di Medecina. Più tardi, Monsieur Laprevotte, farmacistu à l'uspidale militare di Bastia, dosa u so cuntenutu in gasu carbonicu. « U giornale liberu di a Corsica », di sabbatu u 20 di lugliu di u 1833, evucheghja i travaglii di stu farmacistu nant'à a sorgente dipartimentale Sorgente Suttana. In u 1847, l'Acque d'Orezza eranu citate in u « Manuale di l'Acque Minerale » publicatu in Parigi.



**I**mbuttigliata dapoi più d'un seculu, tempi fà in e buttiglie di 75 cl (oghje l'acqua d'Orezza si trova in 1L, 50 cl è 33 cl ), l'acqua d'Orezza fù rinumata per a so divizia in ferru, 25 à 30 mg/litru. Una di l'acque minerale più ferrigne di u mondu. Fubbe dunque autorizzata da un decretu ministeriale u 25 d'aprile di u 1856 è ricunnisciuta pè u so interessu publicu da un decretu imperiale u 7 di ferraghju di u 1866.

**L'**accademia di Medecina hà ammessu e qualità di purezza originale di st'acqua. Numerose cumunicazione, guide di l'acque minerale è ancu a tesa di u Duttore Comiti, in u 1971, descrivenu e pruprietà di st'acqua, cunsigliata tempi fà pè i casi d'anemia per via di mancanza di ferru. Ci vole à rammentà chì, tandu, e padule à l'orlu di u mare eranu invadite di zinzale è i casi di malaria eranu numerosi. Sti malati truvavanu ferru in l'acqua d'Orezza permettenduli di ricustitui i so globuli rossi.

**A**rinomina di l'acqua s'hè prestu sparta è ottene, durante l'epuca di prusperità di u termalismu, numerose distinzione : medaglie d'oru in Parigi in u 1900, Hanoi in u 1902, Bordeaux in u 1907 è diplomi d'onore in Marseglia in u 1900, Londres in u 1908, Bruxelles in u 1910 è Liò in u 1914. Tandu, u gustu di l'acqua hè abbunitu è si pò beie durante i ripasti. Dapoi anni è anni, l'acqua minerale d'Orezza hè pruposta in i ristoranti rinumati di Corsica. Ghjè un elementu di u patrimoniu isulanu.

**U**Duttore Pasquale Zuccarelli, in u so « Studiu di l'acqua minerale naturale d'Orezza » (1905), hà fattu u listinu di l'indicazione terapeutiche permettendu risanamenti parziali è, più spesso, totali. Un travagliu durante dece anni d'esercizii è d'osservazione diverse à prò di i curisti venendu da parechji lochi.

**D**ifatti, a purezza hè una caratteristica di l'acqua d'Orezza : assenza di nitrita, nitratu è ammoniu. Cuntenendu calciu (220 mg/litru) è bicarbonati (843 mg/litru), ghjè un'acqua bicarbonatata, calcica chì face digeri megliu è favorizeghja a mineralizzazione. Avendu pocu pocu sodiu (6,3 mg/litru), a ponu beie e persone seguitendu un regime cù una cunsumazione debule di sale. Ghjè dinù un'acqua chì vi caccia a sete. Infine, hè un piacè di savuri un pruduttu bullicinente è à tempu digestu grazia à u so gasu carbonicu naturale d'origine mammaticu chì si trova à più di 6000 metri di prufundezza sott'à a scorza terrestre.

## ➤ U situ di l'Acque d'Orezza à l'entre di u XXI<sup>mu</sup> seculu

In u 1998, Francescu Saveriu Mora, uriginariu di a Monaccia d'Orezza, ottene da u Cunsigliu Generale di Cismonte, pruprietariu di l'Acque d'Orezza, un cuntrattu di cuncessione grazia à una delegazione di serviziu publicu. Ripiglia tandu a spluttazione è face rinvivi l'Acque d'Orezza pè fanne un pruduttu di prima trinca, cunnisciutu è apprezzatu in u mondu interu. Sott'à u cumandu di a SNEEMO (Société Nouvelle d'Exploitation des Eaux Minerales d'Orezza), l'acqua acitosa Orezza entre in u XXlu seculu

2021 : A SNEEMO ottene una prulungazione di quatr'anni per a spluttazione d'Orezza in u quadru d'un cuntrattu d'affittu-gerenza. Un cuntrattu novu è appariatu di u pattu, chì a sucetà oramai gestita da Marie-Laurence Mora, veduva di Francescu Saveriu Mora, susteni l'attori publichi è privati di u territoriu di a Castagniccia, anzituttu in i duminii culturali, spurtivi è patrimoniali.